

Mighty Talent a conquista loke ta di dje



Durante traspaso di mando na Prins y Pancho di Carnaval 55

Prome Minister Oduber a condena esnan cu kier kibra Carnaval; esaki ta unico fiesta cu ta uni pueblo



MANERA cu a bira un tradicion caba tur aña durante temporada di Carnaval ta tuma lugar na Sede di Gobernacion, e traspaso di mando di Minister President sr. Nelson Oduber na e Prins y Pancho, kendenan lo bay guia nos Carnaval. Diadomingo mainta ultimo a

tuma lugar e traspaso y esaki despues cu e Prins y Pancho a haci nan proclamacion. N'e ocasion aki tabata presente tambe e Prins y Pancho infantil y e Prins y Pancho Hubenil. No a falta tambe e Reinanan, esta esnan infantil, hubenil y grandi. Tabata un mainta sumamente

ameno caminda Minister President Nel Oduber y Presidente di SAC, sra. Tecla Kelly a enfatisa riba e union cu mester resalta pa cu nos Carnaval y nan a desea henter comunidad un feliz temporada di Carnaval 55.

Nos di AWEMainta a scucha cu masha atencion e discurso

di Prome Minister Nel Oduber, cu na nos interpretacion tabata un mensahe na tur esnan cu kier kibra Carnaval. P.e. na su propio Minister drs. Candelario (Booshi) Wever, kende kier of a organisa un actividad deportivo riba tereno di famia, cu manera el a bisa, pa recauda fondo pa manda un pelotero Merca, pero

den mesun rosea, esaki lo bira un concierto, cu e.o. Le Groove. No por kita for di e impresion cu tur esaki a ser haci, pa boycotea e Calypso y Roadmarch Contest, pasobra Lo Groove y Anthony Gario a keda afo. Pesey e mensahe di Nel Oduber, cu e no ta sostene esnan cu kier kibra Carnaval, ta uno cla y raspa.